



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 26.09.2025. godine

VIJEĆNIČKA PITANJA
POSTAVLJENA NA 10. REDOVNOJ SJEDNICI OPĆINSKOG VIJEĆA VOGOŠĆA
održanoj 25.09.2025. godine

Na 10. redovnoj sjednici Općinskog vijeća vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

- 10/1.** Pitanje upućujem Kabinetu premijera Kantona Sarajevo, te resornom ministarstvu Kantona Sarajevo. Prema mojim saznanjima imenovana je Radna grupa za analizu uslova, regulative za proces legalizacije bespravno izgrađenih objekata na području Kantona Sarajevo. Obzirom da u sastavu radne grupe nema predstavnika iz Općine Vogošća, ono što mene zanima, a vjerujem i većinu građana općine Vogošća, kada i ko je imenovao radnu grupu te ko je čini i kojim aktom je imenovana Radna grupa za izradu regulative za proces legalizacije bespravno izgrađenih objekata u Kantonu Sarajevo.
- 10/2.** U prethodnom mandatu pokrenuo sam inicijativu prema Ministarstvu za boračka pitanja Kantona Sarajevo, Ministarstvu zdravstva Kantona Sarajevo, te prema JU Dom zdravlja Kantona Sarajevo za uspostavu ambulante za veterane odbrambeno-oslobodilačkog rata 92-95, sa ciljem unaprijeđenja zdravstvene zaštite boračke populacije na području općine Vogošća. Saglasnost je data za organizacione jedinice Novi Grad, Stari Grad, Novo Sarajevo, Centar i Ilidža, te je projekat već odavno u ovim općinama realizovan tj. uspostavljene su ambulante za veterane odbrambeno-oslobodilačkog rata 92-95. Iz odgovora na pokrenutu inicijativu dobili smo čvrsta obećanja da će se i u našoj općini uspostaviti ambulanta za veterane odbrambeno-oslobodilačkog 92-95. Ono što mene konkretno zanima je:
1. Da li su nadležne institucije dale saglasnost za uspostavu ambulante u okviru Organizacione jedinice Dom zdravlja Vogošća.
 2. Da li su nadležne institucije obezbjedile finansijska sredstva i ljudske resurse, doktore, medicinsko osoblje za realizaciju ovog projekta.
 3. Da li je Organizacione jedinice Dom zdravlja Vogošća izvršio sve potrebne pripreme za uspostavu ambulante za veterane, uključujući izmjene pravilnika i osiguranje tehničkih uslova. Ukoliko pripreme nisu završene, molim da se dostavi informacija u kojoj su fazi i kada se planira njihovo okončanje.
 4. Kada konačno možemo očekivati uspostavu ambulante za veterane u okviru Organizacione jedinice Dom zdravlja Vogošća.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

- 10/3.** Vogošća je grad sa malo parking mjesta, a puno „usporivača brzine“, te takav ambijent čini zabrinjavajuću činjenicu da su gužve i na sporednim ulicama što dodatno izaziva nervozu vozača. Većina „usporivača brzine“ su napravljeni od asfalta i često predstavljaju prave prepreke u toku vožnje. Postavlja se pitanje, ko je nadležan za oštećenje vozila, posebno auta, sa spuštenim ovjesom, jer postoji mogućnost oštećenja spojelera, krajnica, selena i ležajeva. Pred nama je još jedna zima i nadam se da će biti snijega, te se postavlja pitanje kako će vozila za čišćenje snijega raditi svoj posao, ako imaju stalne prepreke „usporivače brzine“. Ako je Ministarstvo saobraćaja Kantona Sarajevo odobrilo postavljanje „usporivača brzine“, sigurno nije naložilo da se prave prepreke na putu koje oštećuju auta. Preporučljivi usporivači brzine su:
- Uređaji postavljeni na autocestama za usporavanje vozila,

- Obično su trakastog ili tačkastog oblika,
- Materijal je uglavnom guma ili metal,
- Obično su žute i crne kako bi privukle vizualnu pozornost.

Još jedno pitanje, koliko košta jedan "usporivač brzine" i zna li se tačan broj do sad postavljenih na ulicama Vogošće.

10/4. Općina Vogošća ima svoju bližu i daljnju historiju, a ljepota su ljudi koji žive na ovom području. Nekad su Vogošću gledali i divili se garndioznoj autoindustriji i drugim pogonima, koji su radili u punom kapacitetu. Ovako jak industrijski centar je bio dio razvojne kičme ex Jugoslavije. Danas Vogošća ima kapacitet da se razvije u industriju do realnih nivoa, ali najveće blago su ljudi, posebno djeca, jer je naša Vogošća pozitivna u prirodnom priraštaju. Imamo tendenciju rasta i želimo biti grad koji ima sve što je potrebno za život. Pitanje, obzirom da je usvojena turistička agenda za općinu Vogošća, da mi kažete, da li imate podatke koliko je bilo turista u 2025 godini bilo u Vogošći, koliko dana su boravili, gdje su spavali i koliko su se zadržali. Da li Vogošća treba neki turistički biro, jer smatram da ima kapacitete koji bi mogli zadržati turistu bar par dana. Blizina Sarajeva, okolna brda i ljepote prirode daju mogućnost da se turisti zadržavaju. Preljep fudbalski stadion, može biti utočište za pripreme fudbalskih ekipa. Gastro ponuda vogošćanskih restorana je poznata u regionu, a rad naših hotela pokazuje da je ove godine u Vogošći bilo stranih turista. Ulaganje u turizam je sigurna, čista i provjerena karta za dodatni razvoj jedne općine, koja ima tendenciju rasta i razvoja. Davne 1881. godine, New York je prvi u svijetu dobio struju, a odmah iza ove svjetske metropole, a zahvaljujući Austrougarskoj, u Semizovcu, općina Vogošća je 1890. godine, pet godina prije nego li u samom Sarajevu donesena i instalirana prva sijalica.

Vijećnik **Gluhović Alija (u ime Kluba vijećnika Naprijed BiH)** postavio je slijedeća vijećnička pitanja:

- 10/5.** Postavljam pitanje nadležnoj općinskoj službi, ministarstvu kao i prijevoznicima zašto autobusi više ne saobraćaju dva puta dnevno prema naselju Rosulje, kao što je do sad bio slučaj. Obzirom na veliki broj stanovnika u ovom dijelu naselja, opravdana je zabrinutost građana koji nemaju prijevoz iz ovog dijela naselja ni prema centru Sarajeva niti Vogošće. Molim nadležnu službu da utvrdi zašto je došlo do zastoja ovog prijevoza i da li se planira njegova uspostava u komunikaciji sa gore navedenim nadležnim institucijama i preduzećima.
- 10/6.** Postavljam pitanje nadležnoj općinskoj službi dokle je došao projekat izgradnje kanalizacione mreže u naselju Hotonj, ulica Mitra Šućura od broja 281. i dalje prema ulici Rašida Bešlije. Ovaj projekat stvara ozbiljne probleme građanima ovog naselja, te dovodi čak i njihovo zdravlje u opasnost.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 10/7.** Postavljam pitanje prema nadležnoj općinskoj službi vezano za širenje neugodnog mirisa u urbanom dijelu Vogošće u prethodnoj sedmici:
- Da li je nadležna općinska služba poduzela konkretne mjere iz svoje nadležnosti.
 - Ako jeste, koje su tačno mjere poduzete u cilju utvrđivanja uzroka i otklanjanja posljedica.
 - Šta je bio uzrok širenja neugodnog mirisa na koji su se građani općine Vogošća žalili.
- S obzirom na navedene pritužbe građana, smatramo da je neophodno pravovremeno informisanje javnosti i transparentno postupanje u skladu sa zakonskim nadležnostima.
- 10/8.** Postavljam pitanje prema nadležnoj općinskoj službi da nam dostavi informaciju o sljedećem: Kada će doći do uklanjanja kontejnera za smeće iz raskrsnice ulica Jošanička - Samira Gradišića kod „Biokova“, obzirom da se navedeni kontejneri nalaze na samoj raskrsnici čime ugrožavaju sigurnost odvijanja saobraćaja, kao i prelazak pješaka preko pješačkog prelaza.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

- 10/9.** Postavljam pitanje nadležnoj službi Općine Vogošća, da li postoji mogućnost za postavljanje ležećih policajaca, odnosno zamjena već postojećih vibro traka u ulici Vogošćanskih odreda od broja 1. do broj 44.

Obrazloženje:

Poučen dosadašnjim iskustvom, a radi se o brzoj vožnji i divljanju pojedinih vozača, postavljam pitanje da li postoji mogućnost da se postave usporivači brzine tzv. ležeći policajci, umjesto sadašnjih vibro traka kako bi se smanjila brza vožnja i ugroženost pješaka. Zaista ove trake ništa ne znače niti ometaju one što brzaju. Dobio sam nekoliko upita i molbi od građana koji tu stanuju i brinu se za sigurnost sebe i svoje djece.

Vijećnica Curić Samira (u ime Kluba vijećnika SDP) postavila je slijedeće vijećničko pitanje:

- 10/10.** Molim nadležnu općinsku službu da dostavi odgovor na sljedeće: da li postoji mogućnost da se postojeća trasa đačkog autobusa, koji trenutno prevozi djecu iz Osnovne škole „Mirsad Prnjavorac“ do naselja Blagovac III, produži za dodatni jedan kilometar, kako bi obuhvatila i djecu iz naselja Blagovac IV i Blagovac V. Da li je nadležna služba upoznata s tim zahtjevom, te da li je izvršena procjena tehničkih i saobraćajnih uslova za proširenje trase. Može li se kao moguće okretalište autobusa koristiti prostor pored lokalne prodavnice, za koji mještani tvrde da ima dovoljno prostora za manevrisanje.

Obrazloženje:

Stanovnici ulica Blagovca IV i V su mi se obratili sa molbom da se đačkom autobusu omogući produžetak trase, kako bi i njihova djeca imala ravnopravan i siguran pristup osnovnom obrazovanju, jednako kao i djeca ulice Blagovac III. S obzirom na to da se radi o maloj udaljenosti i da navodno postoji adekvatan prostor za okretanje vozila, molim nadležne da razmotre ovu mogućnost i informišu Vijeće o eventualnim preprekama ili planovima za realizaciju.

Vijećnik Cvrk Ćamil (u ime Kluba vijećnika DF) postavio je slijedeće vijećničko pitanje:

- 10/11.** Postavljam vijećničko pitanje za Policijsku upravu Vogošća. Po trenutno važećem regulacionom planu u centralnoj zoni Vogošće, u ulici Jošanička, nije planirana biciklistička staza, jer širina trotoara ne omogućava istovremeno korištenje za pješake i bicikliste. Međutim, u praksi smo svjedoci da se ovim trotoarom, pored pješaka, kreće i veliki broj biciklista, ali i vozača električnih romobila. U ovakvoj situaciji sigurnost pješaka je ozbiljno ugrožena, naročito djece različitih uzrasta, jer se biciklisti često kreću prilično brzo i bez posebne pažnje. Vozači električnih romobila dodatno doprinose nesigurnosti. Moje pitanje za Policijsku upravu Vogošća glasi: mogu li se i na koji način, u okviru svojih nadležnosti, uključiti u rješavanje ovog problema.

Vijećnik Selimović Bego (u ime Kluba vijećnika SDA) postavio je slijedeća vijećnička pitanja:

- 10/12.** U ime građana MZ Svrake postavljam pitanje koje glasi: dvije godine u prioritetima putne infrastrukture pod broj 1., je nastavak izgradnje puta Svrake IV-Krivoglavci-Vogošćanska petlja. Navedena dionica je uredno uvrštena u Program prioriteta Općine Vogošća. Navedeni prioritet je vizualno u stanju mirovanja. Imam saznanja da je došlo do određenih poteškoća u realizaciji ovog projekta, pa molim da mi se odgovori na molbu uz ili zahtjev nadležnih službi da se poduzmu potrebne radnje da se ovo što prije riješi ako ima određenih problema.
- 10/13.** Postavljam pitanje nadležnoj općinskoj službi, već deceniju govorimo i stavljamo u prioritete most na rijeci Bosni o izradi idejnog izvedbenog projekta i realizaciji istog. Poznato mi je da je Općina Vogošća sa Direkcijom za puteve Kantona Sarajevo dogovorila da projektnu dokumentaciju za navedeni most naručuje i izrađuje Direkcija. Molim da mi se odgovori u kojem je stepenu realizacija istog i ima li nade za građane Svraka da mogu ulaziti u naselje u trećoj deceniji 21 vijeka na kvalitetniji način, kvalitetnijim mostom sa dvije saobraćajne trake.

Vijećnik Škoro Hamdija (u ime Kluba vijećnika Naprijed BiH) postavio je slijedeća vijećnička pitanja:

- 10/14.** Postavljam pitanje nadležnoj općinskoj službi, dokle je došao projekat izgradnje vodovodne mreže u naselju Gornja Jošanica I, i kada je planiran završetak, jer građani ovog naselja već jako dugo čekaju da dobiju vodu, a često se dešava da tri i više dana nema vode u ovom dijelu naselja zbog redukcije. Molim nadležnu službu da dostavi sve relevantne informacije za ovaj projekat kako bi se građani i ovo Vijeće informisali.

- 10/15. Postavljam pitanje prema nadležnoj općinskoj službi da li je upoznata sa nelegalnom deponijom smeća koja se nalazi u ulici Braće Kršo preko puta zadnje zgrade uz potok, kao i da li je postupala po ovom problemu, obzirom da stanovnicima ovog dijela naselja stvara ekološke i potencijalno zdravstvene probleme. Ukoliko jeste, molim da mi dostavite detaljan izvještaj, a ukoliko ne, da poduzmete sve potrebne radnje u skladu sa vašim ovlaštenjima i nadležnostima.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

- 10/16. U kojoj su fazi nalaze aktivnosti na izgradnji javne rasvjete u ulici 24. juni, od broja 44. do broja 46.

Obrazloženje:

Stanovnici predmetnog dijela ulice duži vremenski period suočavaju se sa problemom nefunkcionalne javne rasvjete, što značajno utiče na kvalitet života, sigurnost građana, kao i sigurnost u saobraćaju, naročito u večernjim satima. Nedostatak javne rasvjete povećava rizik od saobraćajnih nesreća, otežava kretanje pješaka posebno djece i starijih osoba, te predstavlja sigurnosni rizik, budući da smanjena vidljivost pogoduje izvršenju krivičnih djela. Prema informacijama kojima raspolazem, Služba za investicije i komunalne poslove Općine Vogošća je u prethodnom periodu izradila Elaborat rekonstrukcije i izgradnje javne rasvjete na području općine, koji je sačinjen na osnovu zahtjeva mjesnih zajednica i prioriteta iskazanih od strane građana, a ukupna vrijednost predviđenih radova procijenjena je na oko 413.000,00 KM. Imajući u vidu navedeno, molim za informaciju o statusu realizacije izgradnje javne rasvjete na navedenoj lokaciji.

- 10/17. Da li su nadležne općinske službe, u saradnji sa Veterinarskom stanicom "Novi Grad" d.o.o. Sarajevo, kontaktirale i skrenule pažnju na navedeni problem ili poduzele druge konkretne aktivnosti u cilju efikasnog rješavanja problema povećanog broja pasa lualica i napuštenih pasa na području naše općine, imajući u vidu da, uprkos učestalim prijavama građana i sekretara mjesnih zajednica, stanje na terenu ostaje nepromijenjeno i dalje predstavlja ozbiljnu prijetnju sigurnosti stanovnika.

Obrazloženje:

Na području naše općine u posljednje vrijeme evidentiran je znatan porast broja pasa lualica i napuštenih pasa. Imajući u vidu dugogodišnje probleme sa kojima se općina suočava u vezi s ovim pitanjem, neophodno je hitno i odgovorno djelovanje s ciljem zaštite sigurnosti građana, ali i dobrobiti životinja. U Budžetu Kantona Sarajevo za 2025. godinu planirana su finansijska sredstva u iznosu do 250.000,00 KM za hvatanje i zbrinjavanje pasa lualica na području svih općina Kantona. Ministarstvo komunalne privrede, infrastrukture, građenja i zaštite okoliša potpisalo je Ugovor sa Veterinarskom stanicom "Novi Grad" d.o.o. Sarajevo, u okviru kojeg je obuhvaćena i Općina Vogošća. Građani, putem prijave veterinarskoj stanici i sekretarima mjesnih zajednica, kontinuirano ukazuju na lokacije na kojima se problem pojavljuje. Međutim, uprkos navedenim aktivnostima, stanje na terenu i dalje ostaje nepromijenjeno. Veliki broj pasa lualica i napuštenih pasa i dalje se nalazi na javnim površinama, predstavljajući ozbiljnu prijetnju sigurnosti naših građana.

Vijećnik **Turković Faruk (u ime Kluba vijećnika SDA)** postavio je slijedeća vijećnička pitanja:

- 10/18. Koje su aktivnosti poduzete od strane Službe za investicije i komunalne poslove Općine Vogošća kada je u pitanju sanacija začepljene kanalizacione mreže u ulici Stara Cesta 1, naselje Kobilja Glava. Da li je izvršena koordinacija sa KJKP „Vodovod i kanalizacija“ Sarajevo i postoje li informacije kada će se pristupiti rješavanju ovog problema.

Obrazloženje:

Začepljenje kanalizacione mreže izazvalo je stvaranje fekalnog jezera i curenje kanalizacijskih voda ulicom kojom svakodnevno prolaze pješaci i djeca na putu do škole. Ovakva situacija predstavlja ozbiljnu ekološku prijetnju i potencijalni izvor zaraze, te zahtijeva hitnu intervenciju.

- 10/19. Da li Služba za investicije i komunalne poslove može izdati odobrenje za privremeno zauzimanje javne površine u vlasništvu Zavoda za izgradnju Kantona Sarajevo u svrhu izgradnje parkinga u naselju Hotonj, između Osnovne škole i šehidskog spomenika?

Obrazloženje:

Prema tvrdnjama mještana, parking je nužan jer se trenutno vrši sanacija ulice, a stanovnici nemaju mogućnost pristupa svojim kućama motornim vozilima. Privremeno rješenje bi značajno olakšalo svakodnevni život građana.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

10/20. U ovogodišnjem Budžetu Općine Vogošća za Program prioriteta planirana je izrada projekta za rekonstrukciju Bunkerskog mosta, kao i sanacija/asfaltiranje ulice Stara željeznička stanica. Molim da mi se dostavi informacija da li je navedeni projekat izrađen i u kojoj se fazi trenutno nalazi.

10/21. U Programu prioriteta projekata iz oblasti komunalne infrastrukture za 2025. godinu uvrštena je rekonstrukcija sagrađajnice sa rekonstrukcijom i postojećih i izgradnjom novih parking mjesta i rekonstrukcijom vodovodne i kanalizacione mreže u ulici Samira Gradišića. Želim postaviti pitanje u kojoj fazi se nalazi, te kada se može očekivati početak radova.

Vijećnik **Gljiva Bego (u ime Kluba vijećnika S BiH)** postavio je slijedeće vijećničko pitanje:

10/22. Na osnovu zahtjeva i pitanja stanovnika ulice Omladinska postavljam slijedeće pitanje: Obzirom da je na ranijim sjednicama Općinskog vijeća pokrenuta inicijativa za sanaciju i uređenje igrališta u ulici Omladinska do broja 29., stanovnike ovog naselja interesuje status eventualne sanacije i uređenja navedenog igrališta.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 26.09.2025.godine

INICIJATIVE POKRENUTE
NA 10. REDOVNOJ SJEDNICI OPĆINSKOG VIJEĆA VOGOŠĆA
održanoj 25.09.2025. godine

Na 10. redovnoj sjednici Općinskog vijeća vijećnik **Handžić Jasmin (u ime Kluba vijećnika SDA)** pokrenuo je slijedeću inicijativu:

10/2. Pokrećem inicijativu prema nadležnom resornom ministarstvu Kantona Sarajevo da uputi prijedlog zakonskog regulisanja obaveze održavanja okućnica-dvorišta, te zemljišta u privatnom vlasništvu i to kroz izradu novog zakona ili kroz dopunu postojećih koji definišu komunalni red kao i instrumente za provođenje tih zakona.

Obrazloženje:

Svjedoci smo da ne samo na području općine Vogošća već i Kantona Sarajevo, postoji veliki broj neodržavanih, zapuštenih i zaraslih privatnih parcela čiji vlasnici ne vode računa o istim. Do sada nisu donesena zakonska rješenja kojim bi građani bili dužni da očiste odnosno održavaju svoje privatne parcele. Također, predlažem da u okviru ove inicijative nadležne službe definišu zapuštene parcele sa podacima o površinama i vlasnicima kako bi se moglo aktivnije djelovati u svrhu provođenja zakonske regulative kojom bi se definisala obaveza vlasnika da održavaju parcele u dvorištima i naseljenim mjestima, a naročito zbog opasnosti od požara, zaraznih bolesti, sigurnosti ljudi i imovine.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

10/3. Pokrećem inicijativu za izgradnju nove ambulate u naselju Semizovac, općina Vogošća.

Obrazloženje:

Javna ustanova Dom zdravlja Kantona Sarajevo, organizaciona jedinica Vogošća, već dugi niz godina pruža zdravstvene usluge stanovništvu u naselju Semizovac u ambulanti koja je montažni objekat i koja je godinama bila jako dobra. Međutim, sada postojeći objekat je u izrazito lošem i dotrajalom stanju. U proteklom periodu svjedočimo kontinuiranom propadanju konstrukcije objekta, pri čemu dolazi do otpadanja dijelova plafona, a u pojedinim dijelovima i do prokišnjavanja krova. S obzirom na značaj ambulate za lokalno stanovništvo i činjenicu da se radi o vitalnoj zdravstvenoj ustanovi, neophodno je pristupiti planiranju i realizaciji projekta izgradnje nove ambulate u Semizovcu. Predlažem da nova ambulanta bude moderno projektovana, dvospratna građevina, uz slijedeće karakteristike:

1. Prizemlje (donji sprat):

- Dva odvojena ulaza radi boljeg protoka pacijenata, ali i u slučaju vanrednih okolnosti (npr. scenarij sličan Covid 19 virusu),
- Prostorije za POM - prijem pacijenata, čekaonica, ordinacija, intervencija i previjalište,
- Prostorije za stomatologiju-čekaonica, prijem pacijenata i ordinacija,
- Toaleti za invalidska lica, toaleti za pacijente i toaleti za uposlenike,
- Prostorija za odmor,
- Prostorija za pripremu za rad,
- Osmisliti mogućnost razdvajanja "kontaminirani" i nekontaminirani dio ambulate u slučaju vanrednih situacija.

2. Sprat:

- Administrativne prostorije i prostor za medicinsko osoblje,
- Dodatni prostori za preventivne i edukativne programe za stanovništvo,

- Nove prostorije za laboratoriju i specijalističke službe, pulmolog i epidemiolog u slučaju epidemija.

Izgradnjom nove ambulante stvorili bi se uslovi za dugoročno i kvalitetno pružanje zdravstvene zaštite, osigurala sigurnost pacijenata i osoblja, te unaprijedila zdravstvena infrastruktura u općini Vogošća. Stoga pokrećem ovu inicijativu nadležnim institucijama, sa ciljem pokretanja aktivnosti na izradi projektne dokumentacije i obezbjeđivanju sredstava za izgradnju nove ambulante u Semizovcu. Općina Vogošća da uradi idejni projekat buduće nove ambulante, a finansijska konstrukcija da bude zajednički realizovana sa kantonalnim i federalnim ili donatorskim sredstvima, jer jak zdravstveni sistem je bitna poluga državnosti.

- 10/4.** Pokrećem inicijativu za uspostavljanje privredne, društvene i turističke saradnje općine Vogošća sa gradom Wolfsburgom, sjedištem Volkswagen koncerna, u cilju otvaranja bar jednog pogona za dijelove ovih automobile na području općine Vogošća.

Obrazloženje

Tvornica Automobila Sarajevo ili skraćeno TAS bila je autoindustrija koja je proizvodila razna Volkswagenova vozila (Volkswagen Buba, Volkswagen Golf I, Volkswagen Golf II, Volkswagen Golf III, Jetta 1, Jetta 2 i drugi). Fabrika je nastala 1969. godine sklapanjem partnerstva sa Volkswagenom, a saradnja je započela montažom Bube, nekadašnjeg najpoznatijeg Volkswagenovog modela. Tvornica se nalazila u Vogošći i bila je 51% u vlasništvu UNIS-a, a 49% u vlasništvu VW-a. Wolfsburg je peti najveći grad u njemačkoj pokrajini Donjoj Saksoniji. Nalazi se na rijeci Aller sjeveroistočno od Braunschweiga, leži na oko 75 km istočno od Hannovera i 230 km zapadno od Berlina. 2013.godine, Wolfsburg je rangiran kao najbogatiji grad u Njemačkoj sa prihodom po stanovniku od 128.000 \$, zbog napretka u auto-industriji. Wolfsburg je popularan kao lokacija sjedišta Volkswagen AG i najvećeg autoindustrijskog pogona na svijetu koji pokriva površinu veličine Gibraltara. Autostadt je atrakcija posjetioca fabrice Volkswagena koja posjeduje niz modela: Audi, Bentley Bugatti, Ducati, Lamborghini, MAN, Neoplan, Porsche, Scania, SEAT, Škoda Auto i VW komercijalna vozila. Općina Vogošća i grad Wolfsburg trebaju biti bratski gradovi u cilju raznih saradnji, a Općina Vogošća treba predložiti gradu Wolfsburgu da naprave eksponat golfa II koji bi se nalazio na kružnom toku prema industrijskoj zoni. Ova saradnja treba da bude vodilja razvoja općine Vogošća u otvaranju radnih mjesta vezanih za auto industriju. Tradicija i sinonim općine Vogošća je golf koji ima dušu i kvalitet dugovječnog automobila.

Vijećnik **Bogilović Enis (u ime Kluba vijećnika NiP)** pokrenuo je slijedeću inicijativu:

- 10/5.** Pokrećem inicijativu prema nadležnoj Službi za investicije i komunalne poslove da rasvjetna tijela novijeg tipa LED, koja su neispravna prijave u Kanton i da traže zamjenska ili koja su u garanciji da traže zamjenska od dobavljača.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

- 10/6.** Pokrećem inicijativu da se u što kraćem roku izvrši sanacija dijela puta u ulici Samira Gradišića, u zoni oko parka, između stambenih zgrada na adresama Samira Gradišića 17., 18., 21. i 22, kao i da se riješi problem odvodnje vode u donjem dijelu iste ulice, iza objekta Konzuma. Građani ovog dijela ulice više od deset godina ukazuju na ovaj problem. Poslije svake, pa i najmanje kiše, dolazi do nakupljanja vode koja se zadržava danima, što ugrožava zdravlje djece koja se svakodnevno igraju u obližnjem parku. Pored toga, ovakvo stanje je neprihvatljivo za ulicu koja se nalazi u samom užem centru Vogošće i stvara lošu sliku o općini. Stoga se predlažem da nadležna služba Općine Vogošća hitno krene sa sanacijom puta i izgradnjom adekvatnog odvoda za oborinske vode na navedenoj lokaciji.

Vijećnik **Gljiva Eno (u ime Kluba vijećnika DF)** pokrenuo je slijedeće inicijative:

- 10/7.** Pokrećem da se na ulazu u naselje Gornji Hotonj postavi nova oglasna ploča.

Obrazloženje:

Na ovoj lokaciji je ranije postojala oglasna ploča, ali je uklonjena. Stanovnici naselja izražavaju potrebu za njenim ponovnim postavljanjem, jer oglasna ploča predstavlja važan vid komunikacije i informisanja građana o aktivnostima mjesne zajednice, općine, kao i drugih relevantnih institucija. Postavljanjem oglasne ploče omogućilo bi se brže i jednostavnije informisanje stanovnika, što doprinosi boljoj povezanosti zajednice i transparentnijem radu nadležnih službi.

10/8. Hitna reakcija na problem izlivanja kanalizacije u naselju Gornji Hotonj.

Obrazloženje:

Pokrećem inicijativu da se hitno riješi problem izlivanja kanalizacije u naselju Gornji Hotonj, u blizini ulice Stara cesta, na potezu od pravca Novi rezervoar prema Dumaci (u blizini kuće Softića). Na navedenoj lokaciji kanalizacija se izlila i formiralo se malo jezerce, a situacija se svakodnevno pogoršava i količina izlivena otpadne vode raste. Problem predstavlja ozbiljnu prijetnju po zdravlje građana, širenje zaraznih bolesti i pojavu neprijatnih mirisa. Kako se u neposrednoj blizini izvode radovi na novoj transferzali (u zoni blizu tunela), postoji mogućnost da je problem nastao i kao posljedica izvođenja radova, oštećenja postojeće kanalizacione mreže ili neadekvatnog privremenog rješenja. Stoga predlažem da Inspekcija i nadležna općinska služba hitno izađu na teren, izvrše uvid u stanje i utvrde da li je uzrok u postojećoj kanalizacionoj mreži ili u radovima na novoj transferzali, te nalože odgovornim subjektima da odmah pristupe sanaciji nastalog problema. Ovim bi se spriječila dalja eskalacija problema i zaštitilo zdravlje i sigurnost naših sugrađana.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

10/9. Pokrećem inicijativu prema JP „Ceste Federacije BiH“, za postavljanje saobraćajnih znakova zabrane skretanja lijevo iz smjera grada i smjera Vogošće na raskrsnici ulica Igmanska i Muje Šejte u naselju Ugorsko, a radi smanjenja saobraćajnih gužvi.

Obrazloženje:

Naime, zbog nedostatka izlivnih traka na raskrsnici ulica Igmanska - Muje Šejte u naselju Ugorsko pri skretanju u lijevo iz smjera Sarajeva i smjera Vogošće, dolazi do saobraćajnih gužvi koje se pretvore u kilometarske kolone u oba smjera. Naročito navedeno je izraženo prilikom jutarnjih i popodnevni sati kada građani odlaze i dolaze sa posla, a u posljednje vrijeme i u toku dana. Kako bi se riješio navedeni problem, zbog nedostatka izlivnih traka za skretanje u lijevo pri presijecanju saobraćaja iz suprotnog smjera, na navedenoj raskrsnici potrebno je postaviti saobraćajne znakove zabrane skretanje lijevo iz pravca Sarajeva i pravca Vogošće. Navedena raskrsnica je regulisana svjetlosnom saobraćajnom signalizacijom, koja naizmjenično propušta saobraćaj kroz navedenu raskrsnicu. Međutim, vozila koja dolaze iz smjera Sarajeva i Vogošće prilikom skretanja u lijevo, dodatno zaustavljaju i usporavaju saobraćaj iz razloga presijecanja saobraćajne trake i puštanja prvenstva prolaza vozilima iz suprotnog smjera. Također, navedenom radnjom ugrožava se normalno odvijanje saobraćaja sa sigurnosnog aspekta. Postavljanjem navedenih znakova bi se smanjile gužve u saobraćaju na navedenoj dionici puta, bio bi sigurniji protok saobraćaja kroz navedenu raskrsnicu, a vozači bi mogli koristiti kružni tok koji se nalazi nedaleko od navedene raskrsnice za prelazak u naselje Ugorsko, kao i prolazak kroz navedenu raskrsnicu iz pravca Ugorskog.

10/10. Pokrećem inicijativu prema nadležnoj općinskoj službi da se izvrši zamjena stare rasvjete koja je nefunkcionalna i postavi nova led rasvjeta u ul. Uglješići.

Obrazloženje:

Naime, navedena ulica je zbog stare rasvjete slabo osvijetljena i potrebna je njena zamjena. Također, neki od rasvjetnih uređaja nisu u funkciji, dok su drugi evidentno dotrajali i ne vrše svoju primarnu ulogu već daju slabu ili treptuću svjetlost. Iz navedenih razloga, potrebno je izvršiti zamjenu navedene rasvjete i po mogućnosti postaviti led rasvjetu, kako bi stanovnici navedene ulice prilikom odlaska i dolaska u navedeno naselje u noćnim satima bili sigurniji.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

10/11. Pokrećem inicijativu prema nadležnom KJKP „Rad“ Sarajevo, da se planira ugradnja i postavljanje video nadzora na mjestima gdje se odlaže otpad.

Obrazloženje:

Postavljanjem video nadzora znatno bi se smanjilo bacanje nedozvoljenog i otpada opasnog po zdravlje, kao i kabastog otpada mimo termina predviđenih tokom godine za tu namjenu. Time bi se i počinio koji prekrše pravila o odlaganju otpada mogli sankcionisati u skladu sa Zakonom o komunalnoj čistoći. Kazne za fizička lica iznose od 100,00 do 1.500,00 KM, dok kazne za pravna lica iznose od 1.000,00 do 5.000,00 KM. U početku bi trebalo postaviti na nekim mjestima koja su blago rečeno „kritična“, a poslije postaviti na sva mjesta za odlaganje otpada. Ovim projektom znatno bi se poboljšala ekološka svijest i briga o građanima.

10/12. Da se u prigodnim programom nastavi obilježavati “Dječija nedjelja” na području naše lokalne zajednice.

Obrazloženje:

Projekat pod nazivom "Dječija nedjelja", je prethodne godine realizovan u organizaciji JU „Kulturno-sportski centar“ Vogošća, te se kao i ostali mnogobrojni projekti pokazao vrlo zanimljivim i kvalitetnim sadržajem. Ove godine planiran je nastavak projekta, te smatram da trebamo svi podržati ovako nešto i da svake godine nastavimo obilježavati prigodnim društveno-zabavnim programom. Obilježavanje "Dječije nedjelje" prilika je da se ukaže na obavezu poštivanja prava i sloboda utvrđenih Konvencijom Ujedinjenih nacija o pravima djeteta, kao što su pravo na život, pravo na slobodu izražavanja, slobodu misli, savjesti i religije, pravo na najviši standard zdravlja itd. Poseban akcenat se ističe na zaštitu djece bez roditeljskog staranja. Dječija nedjelja traje jednu sedmicu od 01.10. do 07.10. Projekti koji se realizuju su dječije radionice, literalni radovi, likovne sekcije, pisma podrške drugarima, izrada poklona za drugare, društveno-zabavne aktivnosti, dječiji koncerti itd. Za ovakve projekte potrebna su i dodatna sredstva, kako bi se program obogatio i izgledao reprezentativno, te se nadam podršci kao i do sada.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 10/13.** Pokrećem inicijativu za postavljanje dva usporivača saobraćaja (ležeća policajca) u naselju Blagovac, radi povećanja sigurnosti djece i svih učesnika u saobraćaju.

Obrazloženje:

Pokrećem inicijativu da se, u što hitnijem roku, pristupi postavljanju dva usporivača saobraćaja (tzv. ležeća policajca) na području naselja Blagovac, općina Vogošća. Konkretno, riječ je o dijelu puta koji predstavlja blagu uzbrdicu, a na kojem pojedini vozači namjerno povećavaju brzinu kako bi stvorili efekat „preijetanja“ pri izlasku na ravniji dio puta. Na toj lokaciji se svakodnevno zaustavlja školski kombi koji prevozi djecu, a u neposrednoj blizini se djeca svakodnevno i igraju, što dodatno povećava rizik od saobraćajnih nezgoda. Na tom dijelu puta ne postoje nikakvi fizički elementi za usporavanje saobraćaja, a s obzirom na to da je prema dostupnim statističkim podacima broj registrovanih vozila u BiH povećan za 20% od augusta 2023. godine, postoji opravdana bojazan da će se saobraćajna nesigurnost dodatno povećati ukoliko se ne reaguje na vrijeme. Također, u većem broju mjesnih zajednica na području općine Vogošća, već su postavljeni slični usporivači saobraćaja, što se pokazalo kao efikasna mjera u zaštiti lokalnog stanovništva. Smatram da je i naselje Blagovac ravnopravan dio općine, te da treba imati isti tretman kada je riječ o sigurnosti u saobraćaju. Stoga predlažem da se nadležne općinske službe u što kraćem roku zaduže da:

- Ispitaju mogućnost i opravdanost postavljanja dva usporivača saobraćaja u naselju Blagovac,
- Ukoliko se utvrdi opravdanost, izvrše neophodne radnje za njihovu izgradnju,
- Dodatne informacije — predložene lokacije za postavljanje usporivača:
43°54'22.9"N, 18°21'08.7"E
(Blagovac III br.182)
43°54'23.0"N, 18°21'10.2"E
(Blagovac III br. 160)

Predlažem da se ova inicijativa razmatra u hitnoj proceduri, imajući u vidu interes i sigurnost djece, lokalnog stanovništva i svih učesnika u saobraćaju

- 10/14.** Pokrećem inicijativu za omogućavanje sufinansiranja produženog boravka učenika osnovnih škola u privatnim ustanovama na području općine Vogošća.

Obrazloženje:

Vlada Kantona Sarajevo trenutno provodi program sufinansiranja produženog boravka za učenike osnovnih škola, ali isključivo u javnim osnovnim školama koje organizuju ovu uslugu. Na području općine Vogošća, jedino Osnovna škola „Zajko Delić“ organizuje produženi boravak. Međutim, kapaciteti tog programa su izuzetno ograničeni i ne zadovoljavaju ni potrebe svih učenika te škole, a kamoli učenika iz ostalih škola na području općine. S obzirom na to da ostale osnovne škole u Vogošći ne nude uslugu produženog boravka, roditelji su prinuđeni koristiti usluge privatnih organizatora, koji funkcionišu u skladu s pedagoškim standardima, ali bez ikakvog oblika institucionalne podrške ili sufinansiranja. Ovakva situacija dovodi do neravnopravnog položaja djece roditelja iz Vogošće u odnosu na ostale općine Kantona Sarajevo, gdje je usluga produženog boravka dostupna u javnim školama uz finansijsku podršku kantonalnih vlasti. Pokrećem inicijativu prema Vladi Kantona Sarajevo — Ministarstvu za odgoj i obrazovanje, kojom tražim da se program sufinansiranja produženog boravka proširi i na privatne organizatore koji pružaju ovu uslugu učenicima osnovnih škola na području općine Vogošća. Ova mjera bi se primjenjivala privremeno, do trenutka kada se u

javnim školama na području Vogošće ne obezbijede kapaciteti koji mogu zadovoljiti realne potrebe svih učenika i roditelja za uslugom produženog boravka. Na taj način bi se osigurala jednakost i ravnopravan tretman građana Kantona Sarajevo, kao i konkretno podrška porodicama koje zbog radnih obaveza nisu u mogućnosti brinuti o djeci u poslijepodnevnim satima.

Vijećnik Cvrk Čamil (u ime Kluba vijećnika DF) pokrenuo je slijedeće inicijative:

10/15. Pokrećem inicijativu da se na lokaciji Ugorsko II, u blizini kućnog broja 38., postavi ležeći policajac (usporivač brzine).

Obrazloženje:

Na ovoj dionici uočena je učestala pojava prekoračenja brzine, što stvara ozbiljnu opasnost za sigurnost pješaka i stanovnika, posebno djece koja se kreću i igraju u neposrednoj blizini puta. Postavljanjem usporivača brzine značajno bi se smanjio rizik od saobraćajnih nesreća i povećala sigurnost svih učesnika u saobraćaju.

10/16. Pokrećem inicijativu za obilježavanje saobraćajnih traka i postavljanje ostalih elemenata horizontalne signalizacije – Blagovac.

Obrazloženje:

Građani naselja Blagovac zahtijevaju od nadležnih institucija, ministarstava, Direkcije za ceste itd. da se pod hitno izvrši obilježavanje kolovoznih traka od kružnog toka kod benzinske pumpe "Energopetrol" prema Industrijskoj zoni i dalje kroz naselje Blagovac. Građani su se u više navrata obraćali na različite adrese kako bi se ovo pitanje riješilo, ali bez uspjeha. Nepostojanje bilo kakve horizontalne signalizacije ugrožava sve učesnike u saobraćaju, stvara mogućnost za različite vrste ekscesa koji bi kao rezultat mogli imati određenu materijalnu štetu ili čak i stradanje ljudi. Da bi se sve ovo izbjeglo i da bi se uredio saobraćaj na ovom području, nužno je što prije uraditi obilježavanje saobraćajnih traka i postavljanje ostalih elemenata horizontalne signalizacije koji postoje u ostalim ulicama.

Vijećnik Selimović Bego (u ime Kluba vijećnika SDA) pokrenuo je slijedeću inicijativu:

10/17. Pokrećem inicijativu prema KJKP „Vodovod i kanalizacija“ d.o.o. Sarajevo putem nadležne općinske službe da se stanovnicima dijela naselja Svrake IV koji imaju gradsku vodu, a računi im dolaze kao „bespravni potrošači“, sa računa ukloni „bespravni potrošač“.

Obrazloženje:

Dio naselja Svrake IV prije petnaest godina su priključeni na vodovod donjeg dijela Svraka. Napominjem da su građani svojim sredstvima finansirali vodovodne cijevi (kabal) platili iskop vlastitim novcem položili cijevi i iste zatrpali. KJKP „Vodovod i kanalizacija“ je građanima ugradio mjerila za vodu i uredno naplatio, ali su formalno ostali kao bespravni potrošači i tako i danas piše na računima. Nelogično, ali je tačno. Zahvaljujući Općini Vogošća i drugim subjektima koji učestvuju u realizaciji projekta vodosnabdijevanja Krivoglavaca, gornje zone Svraka i Ljubine u ime građana Svrake IV tražim kao nulti prioritet da se za ovih cca. trideset kuća preduzmu potrebne radnje od strane nadležnih i da se istim sa računa ukine rečenica „bespravni potrošač“. Napominjem da građani posjeduju uredne građevinske dozvole izdate od nadležne općinske službe. Ako se ovo ne shvati ozbiljno i ne riješi na zadovoljavajući način, mogu se otvoriti bespotrebni problemi, a ne našom krivicom.

Vijećnik Piknjač Admir (u ime Kluba vijećnika NiP) pokrenuo je slijedeće inicijative:

10/18. Pokrećem inicijativu koja se odnosi na Regulacioni plan "Centar" Općine Vogošća, odnosno tražim detaljno obrazloženje u kojoj se fazi nalazi izrada/dorada Regulacionog plana "Centar" Općine Vogošća.

Obrazloženje:

Uzimajući u obzir da smo u prošlom mandatu imali i proveli kompletan proces izrade Regulacionog plana "Centar" Općine Vogošća i da je nakon datog prijedloga Regulacionog plana "Centar" Općine Vogošća isti odbijen, nije usvojen od strane Općinskog vijeća Općine Vogošća, tražim od nadležne Općinske službe da mi odgovori na pitanja:

1. U kojoj je fazi proces izrade Regulacionog plana "Centar" Općine Vogošća od strane Zavoda za planiranje i Zavoda za izgradnju Kantona Sarajevo.
2. Da li nadležna općinska služba treba ponovo predložiti i pokrenuti kompletan proces izrade Regulacionog plana "Centar" (pripremu nacrt, javnu raspravu, usvajanje nacrt, itd..).

3. Koji je planirani vremenski period za usvajanje Regulacionog plana "Centar".
4. Da li je Općinsko vijeće kao najviši organ zakonodavne vlasti isključivo nadležno za donošenje Regulacionih planova i zašto nije, "ako nije", obzirom da se radi o prostornom uređenju i kvalitetu života stanovnika Općine Vogošća.

Cilj ove inicijative je isključivo u interesu građana općine Vogošća, s obzirom na značaj Regulacionog plana "Centar" za pravilno i planirano prostorno uređenje, detaljan razvoj, infrastrukturno planiranje, nove investicije i gradnju, te rješavanje velikih nepravilnosti prilikom nelegalne izgradnje na području pomenutog dijela naše općine Vogošća. Smatram da je od posebne važnosti da vijećnici i građani budu informisani o trenutnoj fazi izrade ovog planskog dokumenta.

- 10/19.** Pokrećem inicijativu kojom tražim od nadležne općinske službe rekonstrukciju dotrajalog i oštećenog puta koji vodi ka naselju Menjak od ulice Muje Šejte prema naselju Ugorsko.

Obrazloženje:

Ovaj put je već duži niz godina u programu prioriteta komunalne infrastrukture Općine Vogošća. Poznato je stanovnicima naselja Menjak da se na rekonstrukciju čeka radi izmjene/zamjene azbestnih cijevi i ostale komunalne infrastrukture koja se nalazi ispod ili u dijelu puta za naselje Menjak. Međutim, kako sam i naveo i kako su mi stanovnici predložili, godinama se po ovom pitanju ništa ne radi. Ovaj put je primarana saobraćajnica koju svakodnevno koristi veliki broj stanovnika, uključujući i odlazak i dolazak djece u školu. Trenutno stanje puta otežava kretanje vozila i pješaka, a posebno brine otežano kretanje u zimskom periodu kada zimska služba koja je zadužena za održavanje ovog puta ne može adekvatno izvršiti čišćenje i održavanje. Stanovnici traže da se rekonstrukcija uradi do polovine puta, odnosno do kuća „Zulića“ dijela puta na kojem nema nikakvih smetnji za njegovu sanaciju i rekonstrukciju.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 10/20.** Pokrećem inicijativu prema nadležnoj općinskoj službi da u skladu sa svojim mogućnostima i nadležnostima pokrene aktivnosti koje bi dovele do stavljanja u funkciju javne česme koja se nalazi na Tržnici Vogošća.

Obrazloženje:

Obzirom da nigdje u blizini nema ni jedne javne česme, gdje bi se moglo napiti vode i osvježiti, mislim da bi dovođenjem u ispravnost ove česme dalo ljepši i korisniji izgled Tržnice Vogošća.

- 10/21.** Pokrećem inicijativu da nadležna općinska služba u ulici Braće Halać postavi više korpi za otpatke duž ulice.

Obrazloženje:

Obzirom na veliki broj stanovnika ove ulice kao i potrebe za odlaganjem otpada prilikom šetnje i drugih aktivnosti, smatram da je neophodno da se duž ulice postavi nekoliko korpi za otpatke.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 10/22.** Pokrećem inicijativu za izmjenu člana 4. Odluke o dodjeli u zakup poslovnih zgrada i prostorija Općine Vogošća, na način da se, pored postojećih odredbi, doda nova tačka 3. koja bi glasila: „Poslovni prostori u vlasništvu Općine Vogošća ne mogu se davati u zakup pravnim i fizičkim licima koja obavljaju djelatnost priređivanja igara na sreću, uključujući kladionice, automat klubove, bingo, igre na automatima, kazina i druge slične sadržaje.“

Obrazloženje:

Općina Vogošća, u skladu sa zakonom, ima pravo da raspolaže i upravlja vlastitom imovinom u javnom interesu. U okviru tog prava, Općinsko vijeće može jasno definisati svrhu i način korištenja poslovnih prostora, vodeći računa o zaštiti interesa građana i unapređenju kvaliteta života u zajednici. Uvođenjem zabrane davanja u zakup općinskih poslovnih prostora za djelatnosti priređivanja igara na sreću, spriječit će se širenje sadržaja koji imaju negativne posljedice na društvenu zajednicu, narušavaju javni moral, te posebno ugrožavaju mlade i porodice. Kladionice i drugi oblici igara na sreću ne doprinose društvenom i ekonomskom razvoju, niti očuvanju kulturno-historijskog identiteta naše zajednice. Naprotiv, ostavljaju dugoročne negativne posljedice po pojedince i društvo u cjelini. Zbog toga smatram da je nužno jasno i precizno ugraditi ovu zabranu u Odluku o dodjeli poslovnih prostora, čime bi se poslala jasna poruka da Općina Vogošća daje prioritet sadržajima od

općeg interesa, koji doprinose razvoju, sigurnosti i zdravlju naših građana. Ova inicijativa predstavlja korak ka odgovornijem razvoju općine, zaštiti vrijednosti zajednice i stvaranju sigurnijeg, zdravijeg i kvalitetnijeg okruženja za djecu i mlade.

10/23. Pokrećem inicijativu za donošenje Odluke o komunalnom redu na području općine Vogošća.

Obrazloženje:

Polazeći od činjenice da se općina Vogošća ubrzano razvija, smatram da je neophodno paralelno jačati komunalni red i svijest o zajedničkoj odgovornosti za javni prostor. U tom smislu, predlažem da Općinsko vijeće Vogošća pristupi izradi i donošenju Odluke o komunalnom redu. Novom Odlukom jasno bi bile definisane obaveze građana i pravnih lica u pogledu:

- održavanja čistoće i uklanjanja otpada,
- uređenja i saniranja fasada,
- održavanja zelenih površina,
- uklanjanja nelegalnih objekata,
- pravilnog korištenja javnih površina.

Odluka bi obuhvatila i strožiju kontrolu provođenja komunalnog reda, te sankcije za njegovo nepoštivanje. Time bi se osigurao viši nivo komunalne higijene, sigurnosti i kvaliteta života naših građana. Razlog za donošenje ovakve Odluke leži u činjenici da Zakon o komunalnoj čistoći Kantona Sarajevo nedovoljno tretira pitanja komunalnog reda. Njegove odredbe uglavnom se odnose na održavanje javnih i zelenih površina, dok se ne reguliše adekvatno održavanje naselja, fasada i površina u vlasništvu pravnih ili fizičkih lica koje graniče ili su vidljive sa javnih površina. To za posljedicu ima nemogućnost provođenja inspeksijskog nadzora i sankcionisanja nesavjesnih vlasnika i korisnika. Prema izvještajima nadležnih inspekcija, takvi objekti i površine često nisu samo estetski problem, već i direktna prijetnja zdravlju, životu i imovini građana. Posebno ističem da je, prema raspoloživim informacijama, Općina Vogošća jedina u Kantonu Sarajevo koja još uvijek nema donesenu ovakvu odluku. Stoga predlažem, da se Općina Vogošća ugleda na praksu drugih općina u Kantonu i pristupi donošenju Odluke o komunalnom redu, čime bismo uredili ovu oblast i omogućili efikasan inspeksijski nadzor i kontrolu, uz sankcionisanje nesavjesnog ponašanja. Cilj ove inicijative jeste da se komunalni red na području naše općine uredi na način kako je to riješeno u urbanim sredinama u okruženju, s krajnjim ciljem postizanja optimalnog nivoa komunalne higijene, sigurnosti i uređenosti života građana Vogošće.

Vijećnica **Kobiljak Elvedina (u ime Kluba vijećnika SDA)** pokrenula je slijedeću inicijativu:

10/24. Pokrećem inicijativu prema nadležnoj općinskoj službi za postavljanje rasvjetnih tijela u ul. Hilme Krke od brojeva 18., 20., 22., 24. i ul. Nebočaj brojevi 45., i 47.

Obrazloženje:

U navedenim dijelovima ulica postavljeni su stubovi za rasvjetu, ali ne i sijalice, te je neophodno postaviti 6 sijalica na šest stubova, kako bi i ovi dijelovi ulice imali rasvjetu.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

10/25. Pokrećem inicijativu da se hitno pristupi sanaciji oštećenja na saobraćajnicama u općini Vogošća, nastalih nakon izvođenja različitih radova (sanacija kvarova, priključci i dr.), a koja nisu vraćena u prvobitno stanje.

Obrazloženje:

Naime, uočljivo je da se nakon završenih intervencija na mnogim lokacijama rupe i oštećenja ostavljaju privremeno zatrpani, bez konačne sanacije i asfaltiranja. Ovakva praksa dovodi do dodatnog propadanja ulica, otežava saobraćaj, predstavlja opasnost za vozila i pješake, te narušava sigurnost svih učesnika u saobraćaju. Konkretni primjeri su:

- ul. Ramiza Alića kod broja 33., (nedavno pukla vodovodna cijev – nakon zatrpavanja nije izvršeno asfaltiranje),
- ul. Branilaca Hotonja kod brojeva 5., 22., 29. i kod broja 37. (blizina Sofa marketa – mjesecima stoji rupa na putu),
- ul. Kenana Brkanića (više lokacija u istom stanju),
- ul. Ramiza Alića od broja 70. do 85. (nakon izvedenih priključaka i asfaltiranja, površina je vrlo brzo propala).

Ovo su samo neki od primjera, dok sličnih slučajeva ima i na drugim lokacijama širom općine. Stoga predlažem da se izvrši sistematski pregled svih saobraćajnica, evidentiraju lokacije na kojima nije izvršena adekvatna sanacija nakon radova, te da se iste u što skorijem roku vrate

u prvobitno stanje – kvalitetnim asfaltiranjem i sanacijom. Time bi se spriječilo daljnje propadanje puteva, povećala sigurnost učesnika u saobraćaju i unaprijedila opća slika komunalne uređenosti naše općine.

- 10/26.** Pokrećem inicijativu da se izvrši obnova horizontalne saobraćajne signalizacije, konkretno obnavljanje izbljedadnih pješačkih prelaza na teritoriji općine Vogošća.

Obrazloženje:

Na mnogim lokacijama pješački prelazi su gotovo nevidljivi, što predstavlja veliku opasnost za sigurnost pješaka, a naročito djece i starijih osoba. Redovno i jasno obilježeni prelazi nužni su za povećanje bezbjednosti učesnika u saobraćaju i usklađivanje sa važećim propisima o saobraćajnoj signalizaciji. Zamolila bih nadležnu službu da u što skorijem roku izvrši pregled svih pješačkih prelaza na području naše općine, napravi evidenciju onih koji su izbljedadni te se izvrši njihovo obnavljanje. Prelaze koji nisu na lokalnim putevima i ne spadaju u nadležnost općine, uputiti službeni zahtjev nadležnim institucijama kako bi se isti blagovremeno sanirali.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 10/27.** Pokrećem inicijativu da se postavi tabla sa natpisom zabrane uvođenja kućnih ljubimaca u dječje parkove i igrališta. Zelene površine i dječji parkovi kojih u Vogošći nema tako mnogo i koji su u svakom Vijeću više puta pominjani vezano za uređenje i nabavku dotrajalih mobilijara i sl. zbog ljubimaca koje vlasnici puštaju i dovode u šetnju, narušavaju higijensko-epidemiološke uslove i ugrožavaju zdravlje djece. Naravno, najviše male djece koja se još uvijek u igri sjede i koriste te površine za igranje. Više puta je dokazano da izmeti ljubimaca mogu dovesti do težih zdravstvenih posljedica po zdravlje najmlađe populacije. Molim nadležne službe da ovu inicijativu shvate ozbiljno, ne ugrožavajući ni kućne ljubimce, samim tim treba naći mjesto na kojem isti mogu biti pušteni.

- 10/28.** Pokrećem inicijativu da se izvrši sanacija i zamjena uništenih i dotrajalih klupa u ulici Braće Halač.

Obrazloženje:

U dijelu pomenute ulice nalazi se par dotrajalih i uništenih klupa koje nisu za korištenje. U blizini se nalazi OŠ „Mirsad Prnjavorac“ i Srednjoškolski centar, tako da djeca ne mogu na velikom odmoru sjesti pojesti užinu. Također, u ulici se nalazi knjižara i druge obrtničke radnje, tako da je prometna i posjećena. Obzirom da i starije osobe svakodnevno prolaze, nisu u mogućnosti iste da koriste pri odmaranju. Opet napominjem da su takva mjesta centar okupljanja druženja i starije i mlađe populacije. Uređenje našeg okoliša je važan segment i treba ga svakodnevno održavati.

Vijećnik **Turković Faruk (u ime Kluba vijećnika SDA)** pokrenuo je slijedeće inicijative:

- 10/29.** Da se organizuju radni sastanci između Zavoda za izgradnju Kantona Sarajevo i Općine Vogošća, s ciljem pripreme prijedloga izmjena odluka i pravilnika koji regulišu zauzimanje javnih površina u vlasništvu Zavoda, kao i izdavanje odobrenja od strane Općine na tim parcelama.

Obrazloženje:

Trenutno je nemoguće dobiti odobrenje za korištenje javnih površina, jer Zavod traži prethodnu saglasnost Općine za sklapanje ugovora o zakupu, dok Općina odbija dati saglasnost prije riješenih imovinsko-pravnih odnosa. Ova neusklađenost dovodi do potpune nefunkcionalnosti administracije, onemogućavajući građane da ostvare svoja prava. Predložene izmjene odluka uklonile bi ove anomalije i pojednostavile procedure. Apelujem na hitnost rješavanja i izražavam spremnost da Općinsko vijeće pruži podršku i omogućiti prohodnost izmjena.

- 10/30.** Da se pokrene izmjena Elaborata o zauzimanju javnih površina Općine Vogošća, uz aktivno učešće Općinskog vijeća u svim fazama njegove izrade.

Obrazloženje:

Elaborat u trenutnom obliku sadrži niz nelogičnosti u vezi s odobrenjima na određenim lokacijama. Uloga Općinskog vijeća ne smije se svoditi samo na formalno usvajanje već pripremljenog dokumenta, već moramo učestvovati u definisanju njegovog sadržaja. Redefinisanje dokumenta i njegovo krajnje provođenje u saradnji s inspektoratom omogućilo bi dosljednu primjenu odluka na terenu i veći stepen povjerenja građana.

Vijećnica **Briga Sanela (u ime Kluba vijećnika SDA)** pokrenula je slijedeće inicijative:

10/31. Na osnovu brojnih upita i potreba građana, pokrećem inicijativu za obnovu dječijeg igrališta u ulici Braće Kršo broj 42.

Obrazloženje:

Dječije igralište na ovoj lokaciji je u izuzetno lošem stanju - sprave su dotrajale, pojedine su oštećene i nesigurne za upotrebu a prostor je zapušten i bez redovnog održavanja. S obzirom da se radi o igralištu koje koristi veći broj djece iz okolnih zgrada, njegovo uređenje je od velike važnosti za sigurnost i kvalitetu života lokalne zajednice. Stoga predlažem da se poduzmu sljedeće mjere:

- sanacija ili zamjena postojećih sprava,
- postavljanje zaštitne ograde oko igrališta,
- ugradnja odgovarajuće podloge,
- uvođenje redovnog održavanja igrališta.

10/32. Pokrećem inicijativu za pokretanje manifestacije "Porodični dan u Vogošći".

Obrazloženje:

Porodica je temelj svake zajednice, a općina Vogošća se kontinuirano razvija kao mjesto poželjno za život mladih porodica. Međutim, pored infrastrukturnih ulaganja, jednako je važno jačati zajedništvo, socijalne veze i osjećaj pripadnosti lokalnoj zajednici. S tim ciljem predlažem pokretanje manifestacije "Porodični dan u Vogošći", koja bi se organizovala jednom godišnje, a koja bi okupljala porodice, djecu i mlade s područja naše općine. Ciljevi manifestacije:

- Jačanje porodičnih vrijednosti i međusobne povezanosti građana,
- Promocija zdravih životnih navika kod djece i odraslih,
- Pružanje prostora za druženje, zabavu i edukaciju,
- Prezentacija rada lokalnih sportskih klubova, kulturno-umjetničkih društava i udruženja građana.

Predložene aktivnosti:

1. Sportske igre za djecu i roditelje – mini turniri u fudbalu, odbojci, basketu, štafetne igre i poligoni spretnosti.
2. Kreativne i edukativne radionice za djecu – crtanje, oslikavanje, reciklažne radionice i mali eksperimenti.
3. Zabavni program - nastupi lokalnih KUD-ova, školskih horova, dječijih ansambala i muzičkih sekcija.
4. Prezentacija rada sportskih i kulturnih klubova – s ciljem motivisanja djece i mladih da se uključe u aktivnosti.
5. Kutak za zdravlje – u saradnji sa domom zdravlja i nevladinim organizacijama, mjerenje pritiska, šećera, savjeti o ishrani i prevenciji bolesti.

Organizacija i partneri:

Predlažem da Općina Vogošća bude glavni organizator, uz podršku:

- JU „Kulturno-sportski centar“ Vogošća za prostor i tehničku podršku,
- Osnovnih škola za uključivanje učenika,
- Sportskih klubova i kulturno-umjetničkih društava,
- Privatnog sektora kroz sponzorstva i donacije.

Očekivani efekti:

- Stvaranje pozitivne atmosfere u zajednici,
- Promocija porodičnih vrijednosti,
- Aktiviranje mladih kroz sport, kulturu i edukaciju,
- Povezivanje Općine, građana i lokalnih udruženja.

Ova inicijativa bi mogla postati tradicionalna manifestacija, a uz adekvatnu medijsku promociju, značajno bi doprinijela pozitivnoj slici općine Vogošća kao zajednice koja brine o porodicama i djeci.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

10/33. Pokrećem inicijativu prema nadležnim službama za hitno postupanje i otklanjanje bespravno izgrađenog objekta uz Bunkerski most.

Obrazloženje:

Na osnovu informacija dobijenih od nadležnih inspeksijskih organa, utvrđeno je da se na javnoj površini uz Bunkerski most na području Semizovca nalazi bespravno izgrađen objekat

star više od 40 godina, a danas potpuno van upotrebe i ne koristi ga niko. S obzirom na to da je objekat nelegalno izgrađen, da se nalazi na javnoj površini i da već dugi niz godina nije u funkciji, pokrećem inicijativu za njegovo hitno uklanjanje u skladu sa zakonskim propisima. Dodatno, naglašavam da navedeni objekat narušava izgled okoline i šalje negativnu sliku o lokalnoj zajednici.

10/34. Pokrećem inicijativu da se izvrši zamjena i rekonstrukcija postojećih klupa u blizini vrtića "Trešnjica" i na lokaciji gdje se nalazi pijaca.

Obrazloženje:

Pokrećem inicijativu da se izvrši zamjena i rekonstrukcija postojećih klupa u blizini vrtića "Trešnjica" i na lokaciji gdje se nalazi pijaca, s obzirom da su iste dotrajale i u lošem stanju, a one koje su metalne konstrukcije su zahrdale. Također, predlažem da se na ovim lokacijama postave i dodatne nove klupe, kako bi građani, roditelji s djecom i korisnici pijace imali adekvatan prostor za odmor. Ova mjera doprinijela bi ljepšem izgledu javnih površina, povećanju komfora i kvaliteta boravka građana na ovim frekventnim mjestima, a posebno bi značila najmlađima i starijim osobama koje svakodnevno koriste ove prostore.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

10/35. Na zahtjev mještana, pokrećem inicijativu prema KJKP "Rad" i nadležnoj općinskoj službi da se u naselju Orahov brijeg kod brojeva 16. i 20. (poznato i kao vidikovac) postave table sa zabranom odlaganja otpada. U posljednje vrijeme sve je učestalije odlaganje otpada na pomenutim lokacijama čime se stvaraju divlje deponije. Obzirom da mjesto često posjećuju mještani kao i prolaznici zbog njegovog položaja i panoramskog pogleda, potrebno je u interesu svih posjetitelja spriječiti nelegalno odlaganje otpada. Također, lokacija sa svojim panoramskim pogledom, a u kontekstu stvaranja ljepšeg, prijatnijeg, sigurnijeg i funkcionalnijeg ambijenta na maloj javnoj površini zahtjeva uređenje sa prokresivanjem, postavljanjem klupa, kanti za otpadke sa ugrađenim pepeljarama i eventualno hortikulturno uređenje.

Vijećnik **Gljiva Bego (u ime Kluba vijećnika NiP)** pokrenuo je slijedeću inicijativu:

10/36. Pokrećem inicijativu za sanaciju puta u ulici Rosulje.

Obrazloženje

Usljed posljednjih padavina došlo je do ispiranja nasipa (bankine) pored asfaltna ceste u ulici Rosulje (na dionici puta prema rezervoaru) čime su nastale udubljene rupe uz sami asfaltni sloj. Ova situacija dodatno otežava odvijanje saobraćaja, jer je kolovozna traka uska pa se vozila teško mimoilaze i često su prinuđena da silaze sa asfaltnog sloja u pomenute udubljene dijelove. Ovakva situacija značajno povećava rizik od oštećenja vozila ali i od mogućih nezgoda. Stoga pokrećem ovu inicijativu prema nadležnoj službi da izvrši uvid u stanje, kako bi se izvršila sanacija i nasip bankine na oštećenim dijelovima.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir